

puissance au bien de ladite paix et au recouvrement de la seigneurie de Mondit Seigneur. Et pour ceste cause sommes venu en ceste ville de Bourges aux gens d'eglise, bourgeois et habitans de laquelle, pource qu'elle est aujourduy l'une des plus notables obeissant à Mondit Seigneur, avons exposé nostre vouloir qui est de repeller et debouter le dit mauvais trahaitre President de Prouvence de la compagnie et conversation de Mondit Seigneur, à ce qu'il puisse estre en sa franchise et liberté et que vous et aultres ses bons et loyaux subgez puissent soubs lui demeurer en bonne paix et tranquillité et mieulx vacquer à le conforter, secourir et aider à la confusion de ses ennemis comme à la chose du monde que plus desirons. Lesquelx gens d'eglise, bourgeois et habitans, acertenez des choses dessusdites, se sont adhez avecques nous, promis d'y tenir la main et de toute leur puissance en ce nous aider et secourir. Et pource que sommes acertenez de vos grans loyautés et du bon vouloir que tous jours avez eu au bien de Mondit Seigneur et que ceste matière touche grandement tous ses bons et loyaux subgez, escripvons devers vous en vous priant et requérant de par Mondit Seigneur et nous, si chier que vous desirez son bien et le vostre, que en cette matière semblablement vous vueillez joindre et adherer avecques nous, et en acquittant vos loyaultez nous promettre d'y tenir la main et en ce nous conseiller, secourir et aider de toute vostre puissance. Et semblablement de vostre part vous promectons de bonne foy et par le serment que nous avons à Dieu et à Mondit seigneur le Roy, de vous secourir, aider et conforter, vivre et mourir avecques vous et nous exposer de toute nostre puissance à mettre à exécution les choses dessus dites au bien de Mondit Seigneur le Roy et de tous ses loyaux subgez.

Si nous faictes savoir sur ce par ce porteur vos entencions